

Rau Tau Paulus Iboode Pa Yes Galesia Galesia—Galatians

Maaron tauu ta ighur Paulus pa uraat tooni

¹ Yau Paulus, mbanjoona to Yesu Krisi, ta nabood rau tane. Uraat tau naghhamghamu ne, tamtamon eta ighur ghau pani mako, ve lupuuñ eta to taan tighur ghau pani mako. Yesu Krisi gha Taama Maaron tau ipaburigini pa mateegh na, yesuru ta tighur ghau pa uraat tane. *

² Tonvetaz tisov to Krisi tau tileep tomani ghau ne, yeja nibood rau tane pa yam lupuuñ to Krisi tau aleep irau taan sirivu to Galesia na. *

³ Poia to Tamaan Maaron ve Tiina toit Yesu Krisi iza tsiam, ve tinjin gham aleep poia toman lolomim luuma.

⁴ Krisi iyoki tauu gha imaat itaghon Tamaan Maaron loolo, leso ireu sosor toit, ve ipas ghiit pa saghati tapiri tau aazne ighen irau taan. *

⁵ Tauvene tapait Maaron eeza pa tapiri ve poia tooni ta aazne, ve taghon taghon gha ila. Onoon.

Vaaru poia eemon ighengheen

⁶⁻⁷ Oyai, yau naghham ngar naol pa yam Galesia. Aghita. Ila uraat to Yesu Krisi ve poia tooni, Maaron ipoi gham amin le wa. Eemon yam rekia mon aghur murimim pani, ve aghe ataghon vaaru poia ite. Ve vaaru poia eemon ta ighengheen. It

* **1:1:** Mbanj 9:15 * **1:2:** Mbanj 16:1-6, 18:23 * **1:4:** Mk 10:45

paam mako. Alooŋ. Tamtamon siriv tau tilepleep tomani gham na, yes titortoor vaaru poia to Krisi, ve tikaukau ŋgar tsiam. Zeran tawe, saveeŋ toozi isapir kat. *

⁸ Tauvene yam alooŋ zi sov. Alooŋ. Isaav ighe tamtamon eta, ma aŋela to sambam eta ivotia vaaru poia payam, ve saveeŋ tooni isapir pa vaaru poia tau muuŋ yei nivotia payam, ene aatyavyav to Maaron aat iza a tooni ve ivaghamunia. Yei paam, isaav ighe nigham tauvene, aatyavyav to Maaron aat iza a tsiei ve ivaghamun ghei.

⁹ Tauvene saveeŋ tau nisavia gha alooŋa wa, tauta aazne nayoli muul. Isaav ighe tamtamon eta ivotia saveeŋ payam, ve saveeŋ tooni isapir pa vaaru poia tau muuŋ yam aghamu na, aatyavyav to Maaron aat iza a tooni ve ivaghamunia. *

¹⁰ Yam agham ŋgar mindai? Saveeŋ tsiau tane, yau nasavia to naghams tamtamon lolozi poia payau? Mako. Yau nasavia leso Maaron loolo poia payau. Ve mindai? Yam aghe yau nazuari ghau to naghams tamtamon lolozi? Mako kat! Isaav ighe naghams tauvene, ene yau besooŋa to Krisi mako. *

Yesu Krisi tauu ta ipaghazoŋai Paulus pa vaaru poia

¹¹ Yam tonvetaz, yau naghe yam awatagh kat tauvene: Vaaru poia tau yau nasavia payam na, ene ivot ila to tamtamon eta to taan mako.

¹² Pasaa, yau naghams ila to tamtamon eta mako. Ve tamtamon eta ipaghazoŋai ghau pani

* **1:6-7:** Mban 15:1, 24; 2Kor 11:3+ * **1:9:** Syg 22:18+ * **1:10:** 1Tes 2:4; Yems 4:4

mako. Yesu Krisi tauu, ta ipaghazonjai ghau pani.
*

Paulus ipaesia eez tau i itoor ngar tooni, ve Yesu Krisi ighuru imin mbanjoona tooni

¹³ Ngar tau muun naghhamghamu na, yam aat aloona wa. Saawe tau nataghon yes Yuda pa tutuun ve sunuun toozi, naghur patanani tintiina izaaa to yes tau tileep ila lupuun to Maaron na, ve naghham zi tileep saghat kat. Pasaa, naghe le nareu zi, ve napasov lupuun toozi le isov kat. *

¹⁴ Saawe tana, yau nazuari ghau kat pa sunuun ve tutuun to yei Yuda, le naliiv zetagna naol tau yena tumbuun eemon na. Pasaa, ngar tsiau iyaryaan kat naghe le nataghon dudunai tutuun tisor to tibugna tau tigheen muun ve ilam. *

¹⁵⁻¹⁶ Eemon, saawe tau tina ipoop ghau soone, Maaron isiigh ghau pataghaan wa. Ve murei ra, i ipoi ghau namin le, itaghon tauu lolo ve poia tooni, ve itotoi Naatu payau, leso navotia vaaru pa yes tau Yuda mako na. Saawe tau gabua tana ivot payau, yau nala nail neer eta to taan to ipaghazonjai ngar tsiau ne mako. *

¹⁷ Ma rekia nazala Yerusalem pa ghitoon yes tau timin mbanjoona to Krisi imin maata payau na mako. Malmalig nala naleep izi taan sirivu to Arabia. Naleep le isov, ra namuul nala pa nugh Damaskus.

* **1:12:** 1Kor 11:23; Ep 3:3

* **1:13:** Mbanj 8:3, 26:9+; 1Tim 1:13

* **1:14:** Mbanj 22:3; Pil 3:6

* **1:15-16:** Yer 1:5; Mbanj 9:15; Ro 1:1

18 Ndaman tol isov, ra nazala Yerusalem pa ghitoon Petrus, ve yeiru nileep irau mbon sanjavul ve liim. *

19 Saawe tana, naghita mbanjoona siriv to Krisi mako. Naghita Yakobus tau Tiina toit taazi na mon. *

20 Saveen tau naboode payam ne, ene karom mako. Ila Maaron maata, ene saveen onoon.

21 Yau naghita Petrus le isov, ra nala naleep izi taan sirivu to Siria ve Silisia. *

22 Saawe tana, lupuun to Krisi tau tileep irau taan sirivu to Yudea na, tighita naghog mako.

23 Tilonloon varug mon tauvene: “Neer tau muun ighurghur patanani pa iit tamtamon tau taghur ila Krisi saveen tooni, ve ireureu ghiit, tauta aazne ivovotia saveen tana pa tamtamon.”

24 Tauvene yes tiloon varug pa ngar tau Maaron igham payau na, ve tipait eeza pa tapiri ve poia tooni.

2

Yes mbanjoona tau tileep izi Yerusalem na, tiyok pa uraat to Paulus

1 Ndaman sanjavul ve paan isov, ra yeiru Banabas nizala muul pa Yerusalem. Saawe tana, naghama Titus ve yeja nila. *

2 Nazala sorok mako. Nataghon ngar tau Maaron ivotia payau, tauta nazala. Nila peria, ra yeja yes tau tamtamon tighit zi tighes yes timin daaba pa lupuun to Krisi na, nila nilup ghei soghan, ve

* 1:18: Mban 9:26+ * 1:19: Mt 13:55 * 1:21: Mban 9:30

* 2:1: Mban 11:27, 15:1+

napaes pazi pa vaaru poia tau navovotia pa yes tau Yuda mako na. Pa naroi: Ighe murei tiburig ve tiyau avozi pa uraat tsiau, ene pale uraat tau naghhamu na, ighur anoonja mako.

³ Ve aghita. Titus tau yenja nizala na, i Yuda mako. I to Grik. Eemon yes daaba tawe tizoor-nugh pa ravuunj waaro mako. *

⁴ Saawe tana, tamtamon siriv tau tonjetaz tauu to Krisi mako na, tilam tizool ghei tigde tipadeu payei. Pasaa, yes tiwatagh: Yei nighur ila nighe: lit tamtamon tau tapaak Krisi ve taleep ila tooni na, Krisi ipas ghiit pa eez to taghoniinj tutuunj * wa. Zeran tawe tigde tigham ghei nimin besoonja sorok muul pa yes Yuda gabuazi ve tutuunj toozi. *

⁵ Eemon yei niyooz ariaan, ve niloon alinjazi rigta mako. Pasaa, nighe le saveen onoon to vaaru poia igheen duduunj pa yam tau Yuda mako na.

⁶ Tauvene yau napaesia vaaru poia tau navovotia na pa yes daaba tau tinginngin lupuunj to Krisi, ve tiyok pani mon. Tirere pani mako, ve tiseenja pa saveenj ite paam mako. Mako kat. Daaba tawe, tamtamon titandagh pazi tigde ezazi tintiina. Ve isaav ighe ezazi tintiina, ma lezi ezazi mako, ene yau naghham ngar pa gabua tauvene mako. Pasaa, Maaron paam igham ngar pa tamtamon ezazi mako. *

* **2:3:** Mbanj 16:3 * **2:4:** Zeran tau titaghon eez to tutuunj na, ngar toozi tauvene. Isaav ighe titaghon dudunjai tutuunj naol isov to Maaron, ene pale tiduduunj ila i maata. Ve ighe tisosor pa tutuunj tooni rigta, ene irau tiduduunj ila i maata mako. * **2:4:** Mbanj 15:24; Pil 3:2+ * **2:6:** Mbanj 10:34; Ep 6:9

⁷ Yes daaba tana tighilaal ghau tigde: Maaron inumeer ghau, ve ighur uraat ila nimag ighe navotia vaaru poia pa yes tau Yuda mako na, raraate imin ighur uraat to votiaan vaaru poia pa yes Yuda ila Petrus niima. *

⁸ Pasaa, Maaron ighur ghau namin mbanooᅇa pa yes tau Yuda mako na, ve ipapalot ghau pa uraat tau naghhamghamu ila sosozi, raraate imin ighur Petrus imin mbanooᅇa pa yes Yuda, ve ipapaloti pa uraat tau ighhamghamu ila sosozi.

⁹ Tauvene Yakobus, Petrus, ve Yoan, tau tamtamon tighit zi tigde timuᅇmuuᅇ pa uraat to Krisi na, yes tighilaal tigde: Maaron ighur poia tooni iza tsiau, ve ighur uraat tane ila nimag. Ve lolozi poia pa yeiru Banabas uraat tsiei, ve tighita tigde yeᅇa uraat tsiei eemon. Tauvene yeᅇa nivataki nimamai, ve nimbu saveeᅇ nighe yeiru Banabas aat nila nigham uraat ila yes tau Yuda mako na sosozi, ve yes tigham uraat pa yes Yuda.

¹⁰ Gabua eemon tau tisaav payei tigde nighamu, ene vene: Yei aat matamai iᅇgal tamtamon toozi tau mbolaan igham zi na, ve niyambaar lezi uleeᅇ siriv. Yau naloᅇ saveeᅇ toozi tawe, ve nayok pani mon. Pasaa, muuᅇ ve ilam, ᅇgar tsiau iyaryaᅇn naghe naghham tauvene. *

Paulus iyaon Petrus pa karom tooni

¹¹ Saawe tau Petrus izilam nugh Antiok, i igham ᅇgar tau iduduᅇn mako. Tauvene yau nasaav duduᅇn ila maata, ve nayaoni.

* **2:7:** Mban 22:21; Ro 11:13+
2Kor 8:1+

* **2:10:** Mban 11:29+; Ro 15:25;

¹² Pasaa, muun, i yesna yes tau Yuda mako na, tiluplup zi pa ghanghaniin. Eemon saawe tau Yakobus imbaan zeetna siriv tila tivot toozi, Petrus imoghaagh pa yes tau Yuda mako na, ve yesna tilup zi muul mako. Pasaa, iroi pa yes tau tiyooz ariiaan pa tutuun to Mose ve ngar to ravuun tamtamon warozi. *

¹³ Ve i zigani mako. Yuda siriv tau tighur ila to Yesu na, tipaak Petrus pa karom tooni. Ve Banabas paam, tikau ngar tooni le itaghon zi pa karom toozi tawe.

¹⁴ Yau naghita ngar toozi tawe isapir kat pa saveen onoon to vaaru poia. Tauvene nasaav kat pa Petrus ila eval tiina matazi naghe: “Yo Yuda. Eemon yo upul Yuda gabuazi ve tutuun toozi, ve uleep imin yes tau Yuda mako na. Mindai ta aazne utoor ngar tsio muul ve ughe utaghon Yuda gabuazi? Ngar tau ughamu na, ene pale igham yes tau Yuda mako na matazi ingal tighe yes aat titaghon yes Yuda gabuazi ve tutuun toozi.” *

Tamtamon tau ighu ighur ila to Yesu, ene i iduduun ila Maaron maata

¹⁵ Onoon, yes nugh nugh tau tikankaan pa Maaron na, timamalaan pa tutuun tooni irau saawe. Ve iit tau sinj to Yuda duduun ne, taghamgham tauvene mako.

¹⁶ Eemon iit tawatagh: Ngar to taghoniin tutuun, ene irau igham tamtamon eta iduduun ila Maaron maata ne mako. Ghuruun ila toit tau inarui Yesu Krisi, tauta imin eez pait gha taduduun ila Maaron maata. Puughu tane ta iit taghur ila to Yesu Krisi,

* 2:12: Mbanj 11:3 * 2:14: 1Tim 5:20

leso igham ghiit taduduun ıla Maaron maata. Ve eez to taghoniin tutuun, ene tanumeera muul mako. Pasaa, tamtamon eta irau itaghon dudunai tutuun to Maaron, ve ighamu iduduun ıla Maaron maata ne mako. *

¹⁷ Tauta iit tazuari ghiit taghe le taghur ıla to Yesu Krisi ve taleep tunja ıla tooni. Leso i igham ghiit taduduun ıla Maaron maata. Onoon, saawe siriv, iit tamalaan pa Maaron tutuun tooni. Eemon pale tasaav mindai? Yesu Krisi imin pu-ughu pa sosor toit tawe? Mako kat! *

¹⁸ Ve aghita. Eez to taghoniin tutuun, yau napaghazonaini naghe ene isov wa. Isaav ighe natoor ngar tsiau ve napayooz eez tawe muul, ene aat namalaan pa Maaron ngar tooni. *

¹⁹ Tauvene eez to taghoniin tutuun, yau napuli wa. Pasaa, saawe tau Krisi ibaad sosor tsiau atuya izala ai pambaroon itaghon saveen to tutuun, ene imin yau paam namaat tomania. Tauta aazne, naleep ıla tutuun saamba muul mako, ve naghham lepoogh paaghu ıla to Maaron, ve nabesbees pani.

²⁰ Tauvene lepoogh tsiau tau aazne naghhamu izi taan, ene taug nangini muul mako. Krisi tau ilepleep ıla lolog ne, tauta ingin lepoogh tsiau. Tauvene yau naghur ıla to Maaron Naatu tau ighur loolo payau kat, ve ipul tauu gha imaat payau. Ghuruun ıla tsiau tane, tauta aazne ighamgham pooz payau pa lepoghag to taan. *

²¹ Poia to Maaron tau izazaa toit ıla uraat to Yesu Krisi na, irau matag veleghini imin kaut sorok ne

* **2:16:** Mbanj 13:38+; Ro 3:20, 28; Ga 3:11 * **2:17:** Ga 5:16+

* **2:18:** Ro 10:4 * **2:20:** Ro 6:6, 11, 7:6; 2Kor 5:15

mako. Isaav ighe ngar to taghoniin tutuun irau igham ghiit taduduun ila Maaron maata, ene Krisi imaat sorok. *

3

Yes Galesia tigham Avuvu Patabuyaaj ila eez to taghoniin tutuun mako

¹ Aa yam kankanoonja to Galesia, sei ikau ngar tsiam? Aazne, avaghamgham imin yes tau mura tivaghamun zi na! Saawe tau nileep tomani gham, yei nipaghazonjai gham pa Yesu Krisi, le imin ta taumim aleep, ve aghita tiravu izala ai pambarooj. *

² Aiyo, naghe naghason gham pa gabua ee. Yam agham Maaron Avuvu itaghon saa eez? Eez to taghoniin tutuun, ma eez to aloon vaaru poia ve aghur ila? *

³ Yam aat lemim ngar mako taa? Papazoge, Maaron Avuvu ipaburigin gham gha agham lepooogh poia ila tooni. Puughu mindai ta aazne aghe apasov uraat tooni ila taumim tapirimim?

⁴ Gabua naol tau muun ivotvot payam na, ene ivot payam sorok? Mako! *

⁵ Ve puughu mindai ta Maaron irei Avuvu payam, ve ighamgham gabua ngeretazi ila somim? Yam ataghon dudunjai tutuun tooni, ta ighamgham tauvene payam ne? Mako. Yam aloon vaaru poia mon, ve aghur ila.

Abaram itotoi ghiit pa eez to ghuruun ila

* **2:21:** Hib 7:11 * **3:1:** 1Kor 1:23; Ga 5:7 * **3:2:** Mbanj 2:38; Ro 10:16+; Ep 1:13 * **3:4:** 1Kor 15:2; 2Yo 8

⁶ Matamim ingal imuul ila pa Abaram. Maaron aliinja tau tiboode na, isaav tauvene:

“Abaram ighur ila to Maaron, tauta Maaron ighita ighe i neer duduuna.” *

⁷ Tauvene yam irau awatagh aghe yes tau titaghon eez to ghuruun ila, tauta timin Abaram natja. *

⁸ Maaron iwataghi wa: Murei, nugh nugh tau Yuda mako na, pale tighur ila vaaru poia, ve ghuruun ila toozi tana igham zi tiduduun ila i maata. Pasaa, Maaron aliinja tau tiboode na isaav tauvene: Muun kat, Maaron ivotia vaaru poia pa Abaram ighe:

“Yo pale umin eez pa nughmarin to taan, leso poia tsiau iza toozi.” *

⁹ Tauvene tamtamon tisov tau tighur ila to Krisi na, poia to Maaron aat iza toozi, imin muun Abaram ighur ila ve poia to Maaron iza tooni. *

Eez to taghoniin tutuun, i le patanani

¹⁰ Yes tau tinumeer tige ngar to taghoniin tutuun pale imin eez pazi to tiduduun ila Maaron maata, ene pale aatyavyav to Maaron iza toozi ve ivaghamun zi. Saveenja tiboode pataghaan wa:

“Saveen naol tau tiboode ila rau to tutuun na, yam aat matamim kisin zi ve ataghoniir zi le tisov. Ve sei tau ighe itaghon suvinia mako, ene pale aatyavyav to Maaron iza tooni, ve ivaghamunia.” *

¹¹ Tauvene tutuun irau imin eez pa tamtamon eta to iduduun ila Maaron maata mako. Ene igheen

* **3:6:** Gnp 15:6; Ro 4:3 * **3:7:** Yo 8:39; Ro 4:11+ * **3:8:** Gnp 12:3, 18:18, 22:18 * **3:9:** Ro 4:16 * **3:10:** Lo 27:26

mataghare wa. Pasaa, Maaron aliinja tau tiboode ila rau na, isaav tauvene:

“Tamtamon tau ighe ighur ila, ene aat iduduun ila Maaron maata, ve igham lepoogh poia ila tooni.” *

¹² Eemon eez to taghoniin tutuun, ene ngara ite pa eez to ghuruun ila. Pasaa, eez to taghoniin tutuun, ene vene:

“Tamtamon tau ighe itaghoniir tutuun tisov, ene aat ileep poia.” *

¹³ Tauvene eez to taghoniin tutuun, ene igham patanani pait. Pa ighe tataghon duduunai tutuun mako, ene pale aatyavyav to Maaron izaa toit ve ivaghamun ghiit. Eemon Yesu igham niaan gha ibaad aatyavyav to Maaron izala ai pambaron. Tauta igham mulin ghiit pa patanani tawe. Saveenja ighen pataghaan wa:

“Neer tau ighe tiravu ve ituuk ila ai, ene aatyavyav to Maaron ighen izaa tooni.” *

¹⁴ Krisi igham tauvene, leso poia to Maaron tau muun izaa to Abaram na, izaa to yes tau Yuda mako na paam. Tauta aazne, iit tau taghur ila to Krisi na, tagham Maaron Avuvu itaghon saveen mbuaan tooni. *

Tutuun to Maaron irau ireu saveen mbuaan tooni mako

¹⁵ Yam tonvetaz, yau naghe naghama saveen palelaan pa ngar tau monmon iit tamtamon taghamghamu ne. Isaav ighe tambu saveen eta ve

* **3:11:** Hab 2:4; Ro 1:17; Ga 2:16; Hib 10:38 * **3:12:** Wkp 18:5;
 Ro 10:5 * **3:13:** Lo 21:23; Ro 8:3; 2Kor 5:21 * **3:14:** Yo 7:38+;
 Ro 4:16

tapariaaŋa le iyaryaŋ kat, ene murei tamtamon ite paam irau ireua, ma iseŋga pa saveeŋ ite paam mako. Pasaa, saveeŋ mbuaaŋ tana iyaryaŋ wa.

¹⁶ Aiyo, mataan iŋgal saveeŋ tau muuŋ Maaron imbua tomania Abaram ve paaghu tooni. Saveeŋ tawe iŋarui Abaram paaghu tooni tisov mako. Iŋarui ŋeer eemon, ene Krisi. *

¹⁷ Saveeŋ tsiau tane, puughu tauvene: Maaron imbu saveeŋ tomania Abaram, ve ipariaaŋa le iyaryaŋ kat, ve ndaman ndiŋndiŋ paŋ, tamoot ee, saŋavul (430) ilam ila, ra igham tutuuŋ pa yes Israela. Tauvene tutuuŋ tawe irau ireu saveeŋ mbuaaŋ tau muuŋ Maaron imbua ne mako. Pasaa, tutuuŋ ivot murei. *

¹⁸ Lepoogh poia tau Maaron ighe igham pa tamtamon tooni na, imin ta ŋgar to taghoniŋ tutuuŋ irau imin eez pait to taghamu, kanaŋ taghamu ila eez tana, ve saveeŋ mbuaaŋ ileple. Eemon mako. Pasaa, Maaron imbu saveeŋ pa Abaram ighe i pale igham lepoogh poia tawe pani sorok. *

Puughu tau Maaron igham tutuuŋ pait

¹⁹ Ighe vene, puughu mindai ta Maaron imbu saveeŋ le isov, ra izi gha igham tutuuŋ pa yes Israela? I igham tutuuŋ pa tamtamon to ipaburiŋ ŋgar toozi, leso tighilaal sosor toozi. Ve i ighe tutuuŋ tawe iyooz ariaaŋ le irau Abaram paaghu tooni tau i imbu saveeŋ pani na ilam ivot. Tutuuŋ tana, yes aŋela tigham pa Mose, ra i aana isakia

* **3:16:** Gnp 12:7, 22:18, 24:7 * **3:17:** Igham 12:40+ * **3:18:** Ro 4:13, 11:6

ila pa yes Israela. Pasaa, i ta iyooz bodbodaan pa Maaron ve yes Israela. *

²⁰ Eemon saawe tau Maaron imbu saveen tomania Abaram, tamtamon eta, ma aŋela eta ileep bodbodaan pa Maaron ve Abaram, ve isakia Maaron aliinŋa ila pa Abaram ne mako. Abaram iloon saveen ila Maaron tauu aavo. Pasaa, Maaron zigani ta ileep, ve isavia.

²¹ Ma mindai? Saveen mbuaan to Maaron iparav tomania tutuun tooni? Mako kat! Imin ta tutuun eta irau imin eez pait to tagham lepoogh poia ila to Maaron, kanan ngar to taghoniin tutuun irau igham ghiit taduduun ila Maaron maata.

²² Eemon mako. Pasaa, Maaron aliinŋa tau ti-boode na, isaav ghazonŋa tauvene: Ngar saghati ikau iit tasov, le tamin yes tau tileep ila ruum to yavyavuun loolo. Saveen tane ipaghazonŋai ghiit pa sosor toit. Leso taghur ila to Yesu Krisi, ve ghuruun ila toit imin eez pait to taghita saveen mbuaan to Maaron anoonŋa. *

²³ Muun, saawe tau taleep ila tutuun saamba, lepoogh toit imin yes tau tileep ila ruum to yavyavuun loolo. Pasaa, tutuun inŋin ghiit pa gabua naol isov. Taleep tauvene le Maaron ipaghazonŋai eez to ghuruun ila ivot ighazonŋ. *

²⁴ Agham ngar pa yes besoonŋa tau tinŋin geegeu ve tipaduduun zi le timin zolman. *

* **3:19:** Yo 1:17; Mban 7:38; Ro 5:20, 7:7 * **3:22:** Mbo 14:3; Ro 3:9+ * **3:23:** Ga 4:3; Hib 9:10 * **3:24:** Yes Grika lezi besoonŋa siriv tau tinŋinŋin natuzŋa. Yes tigham payamyam pa yes geegeu, ve murei tipaduduun zi pa ngar le timin zolman. Mako tipul zi, ve geegeu tawe tinŋin tauzi.

Muun, iit taleep ila tutuun saamba, ve tutuun ingin ghiit imin yes besoonja tawe le Krisi ilam ivot. Leso igherev ghiit tala to Krisi, ve taghur ila tooni, ve i igham ghiit taduduun ila Maaron maata. *

²⁵ Ve aazne, eez to ghuruun ila ivot ighazoon wa. Tauta taleep ila tutuun saamba muul mako, ve tutuun imin padudunjaan pait muul mako. *

Yes tau tighur ila to Krisi na timin Maaron natja

²⁶ Yam asov tau ghuruun ila tsiam isaghav Yesu Krisi na, Maaron natja yam. *

²⁷ Pasaa, yam tamtamon tau agham yaa gha amin Krisi le na, asov agham ngar to Krisi imin lemim wa, imin anonogh gham pa nonoghiinja paaghu. *

²⁸ Ve yam asov raratemim ila Maaron maata. Isaav ighe yam Yuda, ma Yuda mako, ma yam besoonja sorok, ma yam besoonja mako ve angin taumim, ma yam zilivaa, ma zitamoot, gabua naol tauvene, iit tagham ngar pani sov. Pasaa, yam aleep ila to Yesu Krisi, ve i ilup gham asov amin eemon wa. *

²⁹ Tauvene aazne, yam amin Krisi le wa. Ve amin Abaram paaghu tooni paam. Tauta ezamim pa ghamuun lepoogh poia ila to Maaron, itaghon saveen mbuaan tau muun i imbua tomania Abaram na. *

4

Iit tamin besoonja pa tutuun muul mako

* **3:24:** Mbanj 13:39 * **3:25:** Ro 7:6, 10:4; Kol 2:16+; Hib 8:13

* **3:26:** Yo 1:12; Ro 8:14+ * **3:27:** Ro 13:14; Kol 3:12 * **3:28:**

Yo 10:16; Ro 10:12+; 1Kor 12:13; Kol 3:11 * **3:29:** Gnp 21:12; Ro 9:7+

1-2 Saveeņ tsiau tane, puughu tauvene: Isaav ighe tamtamon eta eeza pa ŋginiņ gabua naol isov to taama, ene irau ŋginiir gabua tana rekia mako. Saawe tau i kukua, taghita taghe lepoogh tooni, ene iliiv yes besooņa to taama mako. Pasaa, i ileep ila besooņa siriv sambazi, ve tiņgini tomania gabua tooni tawe. Ve i aat ilepleep tauvene le tizaa pa saawe tau taama ighuru na, mako igham gabua tooni tana, ve tauu iņgin zi.

³Yei Yuda tauvene paam. Muuņ, nileep imin yes geegeu tau ŋgarig gha tighamgham ŋgar. Saawe tana, nibesbees pa tutuuņ naol tau tisavia gabua to taan. * *

⁴Nileep tauvene le nizaa pa saawe duduuņ tau Maaron ighuru na, ra imbaaņ tauu Naatu izilam taan. Livaa ee to taan ipooņa. Ve i ileep ila tutuuņ saamba, ve itaghon katin tutuuņ le isov. *

⁵I ilam to igham mulin yei tau nileep ila tutuuņ saamba. Leso nimin besooņa sorok pa tutuuņ muul sov, ve nimin Maaron natņa. *

⁶Ve yam paam, amin Maaron natņa wa. Tauta Maaron imbaaņ Naatu Avuvu ila lolomim. Avuvu tawe igham ghiit tapoipoi Maaron taghe: “Abba, tamaņ” †

⁷Tauvene aazne, yam amin besooņa sorok muul mako. Pasaa, Maaron igham gham amin i tauu

* **4:3:** Eez ite to tator ziiri tane, ene vene: “Saawe tana, taleep imin besooņa sorok pa avuvu sasaghati tau tiņgin gabua siriv to sambam ve taan.” * **4:3:** Ga 3:23 * **4:4:** Mt 5:17; Yo 1:14

* **4:5:** Yo 1:12; Ro 8:14+; Ga 3:13; 1Pe 1:18+ † **4:6:** Yes geegeu to Israel tiwatwaat tamazņa ila tauzi aliņazi tighe ‘Abba’, imin iit taghe ‘tamaņ’ o ‘ama’.

natŋa wa. Ve isaav ighe i natŋa yam, ene ezamim pa ghamuun lepoogh poia ila tooni. *

Paulus loolo ibubu pa yes Galesia

⁸ Muun, yam awatagh Maaron mako. Saawe tana, yam amin besoonŋa sorok pa gabua soroksorok naol tau Maaron tauu mako. *

⁹ Eemon aazne, yam awatagh Maaron wa. Aiss, nasaav vene sov. Maaron ta iwatagh gham, ve igham gham amin le wa. Tauvene puughu mindai ta aazne, yam aghur murimim pani, ve aghe amuul pa gabuamim muŋgaana, ve ataghon tutuun naol to taan tau lezi tapirizi irau to tiuul gham mako na? ‡

¹⁰ Aazne, yam matamim inŋalŋgal saawe tau kaiyo iza paaghu, ve saawe to ndaman paaghu, ve saawe siriv ta aghur zi timin saawe to sunjuun itaghon ngar to yes Yuda. *

¹¹ Tauta agham ghau lolog ibubu pa uraat tiina tau naghama ila sosomim na. Pale ighur anoonŋa, ma imin kaut sorok?

Paulus itaŋ rarai yes Galesia

¹²⁻¹³ Yam tonvetaz, aghita. Yau napul eez to taghoniin tutuun, ve nataghon yam tau Yuda mako na pa gabuamim. Tauvene aazne, natan rarai gham naghe atoor ngar tsiam, ve amuul alam ataghon ghau pa ngar tau yau naghamsghamu ne. Saveeŋ tsiau tane, nasavia pasaa, naghe yam

* **4:7:** Ro 8:17; Ga 3:29 * **4:8:** 1Kor 8:4, 12:2 ‡ **4:9:** Eez ite to tator ziiri tane, ene vene: "Tauvene puughu mindai ta aazne, yam aghur murimim pani, ve aghe amuul pa gabuamim muŋgaana, ve amin besoonŋa pa avuvu siriv tau lezi tapirizi irau to tiuul gham mako na?" * **4:10:** Kol 2:16, 20; Hib 7:18

agham sosor payau, ene mako. Yam awatagh: Saawe imin maata tau nalat navotia vaaru poia payam, yau namoroon, tauta nazalat naleep tomani gham. *

¹⁴ Moroghoon tsiu tana igham patanani tiina payam. Eemon matamim veleghin ghau, ma azor ghau mako. Yam apakur ghau kat, imin yau anjela eta to Maaron, ma Yesu Krisi tauu.

¹⁵ Saawe tana, yam tintinmim kat pa poia to Maaron tau iza tsiam. Eemon aazne, tintinmim muul mako. Ene mindai? Onoon kat, yau nasaav payam: Saawe tana, lolomim pa uleen ghau kat. Irau anguruut gabua eta payau mako. Imin ta yam irau auul ghau pa matamim, kanan apasu ve agham payau!

¹⁶ Mindai, yau nasavia saveen onoon payam, tauta aghe naghur koi payam?

¹⁷ Zeran tau tizuari zi pa ghamuun lolomim na, ngar toozi poia mako. Yes tigde tigham gham amoghaagh payau, leso ataghon zi pa ngar toozi.

¹⁸ Saawe isov, isaav ighe tazuari ghiit pa ghamuun ngar popoia, ene poia. Tauvene saawe tau naleep tomani gham mako, yam aat matamim kisin ngar poia ve ataghoni.

¹⁹ O natugna, ngar tau aghamu na, ene igham patanani tiina payau muul imin zilivaa tau apozi iyavyav pa popaan. Ve yau aat nabaad patanani tane le irau ngar to Krisi ivot imin tiina ila lolomim. *

²⁰ Oyai, pale naghm mindai payam? Aazne naleep malau payam. Imin ta itinja taleep, kanan

* **4:12-13:** 1Kor 2:3 * **4:19:** Ro 8:29; 1Kor 4:15

aloon saveen duduun ila avog ve nasavia saveen popoia siriv to napaghazonjai ngar tsiam.

Saveen palelaan to Agar gha Sara

²¹ Yam tau aghe aleep ila tutuun saamba na, asaav payau lak. Yam aloon saveen to tutuun, ma mako?

²² Pa Maaron aliina tau tiboode na isaav tau-vene: Abaram natna ru. Ee, ivot ila to Agar, i livaa tau besoonja sorok na. Ve ite ivot ila to azaawa Sara, tau ruum tauu na. *

²³ Besoonja livaa naatu, i ivot itaghon eez to iit tamtamon to taan. Ve livaa tau ruum tauu na naatu, i ivot itaghon saveen mbuaan to Maaron. *

²⁴ Saveen tane, ene imin saveen palelaan. Pasaa, zilivaa ru tawe titotoi ghiit pa eez ru tau Maaron ighuru pa tamtamon. Agar, i imin eez to tutuun tau ivot izi loloz Sinai. Yes tau itaghon eez tawe na timin besoonja sorok.

²⁵ Loloz Sinai, ene igheen taan sirivu to Arabia. Agar imin loloz tawe ve nugh Yerusalem tau aazne igheen izi taan ne. Pasaa, nugh tawe tamtamona timin besoonja sorok pa tutuun.

²⁶ Eemon Yerusalem tauu ta igheen izi sambam na, tamtamona timin besoonja mako. Yes nugh tauna. Yerusalem tawe, ta imin iit tinaan. *

²⁷ Pasaa, Maaron aliina tau tiboode na isaav ighe:
 “Yo livaa tau upoop mako na, tintinim!
 Yo livaa tau uyamaan yavyavuun pa popaan soone na, lolom poia ve alinam izaal”

* **4:22:** Gnp 16:15, 21:2 * **4:23:** Gnp 17:16, 18:10+; Ro 9:7+; Hib 11:11 * **4:26:** Ro 8:15; Hib 12:22; Syg 21:2, 10

Pa livaa tau azaawa ighur muuri pani na, pale natŋa katini ve tiliiv livaa tau i le azaawa na natŋa.” § *

28 Yam tonvetaz, yam amin Sara naatu Isak. Pasaa, saveeŋ mbuaaŋ to Maaron imin eez payam gha amin i tauu natŋa. *

29 Ve matamim ingal imuul ila pa ngar tau muuŋ Ismael igham pa Isak na. Neer tau ivot itaghon eez to iit tamtamon to taan na, ighur pataŋani pa taazi tau ivot ila Maaron Avuvu tapiri. Aazne, ngar raraate ivotvot. Pasaa, yes tau titaghon eez to tutuuŋ na, tighurghur pataŋani pa iit tau Maaron Avuvu igham ghiit tamin i tauu natŋa na. *

30 Ve Maaron aliinŋa tau tiboode na isaav mindai? Isaav tauvene ighe:

“Uziir besoonŋa livaa yesuru naatu tighau! Pa besoonŋa livaa naatu irau ileep tomania livaa tau ruum tauu na naatu, ve yesuru tiyooz pa gabua to tamazi ne mako.” *

31 Tauvene yam tonvetaz, alooŋ. Iit besoonŋa livaa natŋa mako. Iit tinaan, i ruum tauu. *

5

§ 4:27: Muuŋ, lupuuŋ to yes Israela tomania Maaron poia. Eemon yes eval mako. Saawe tana, yes tileep imin livaa tau i le azaawa. Eemon saawe naol, tizoor Maaron aliinŋa. Tauvene murei, i ighur muuri pazi, ve ipul zi tila yes Babilona ve nugh siriv nimazi. Saawe tana, tileep imin livaa tau ipoop mako, ve azaawa ipuli. Aazne, ila uraat to Krisi, Maaron igham eval to nughmariŋ timin i natŋa. Yes Yuda, ve yes tau Yuda mako na paam. Yes tana ta timin Yerusalem to sambam natŋa. * 4:27: Is 54:1 * 4:28: Ro 9:8 * 4:29: Gnp 21:9; Ga 5:11, 6:12 * 4:30: Gnp 21:10; Yo 8:35 * 4:31: Ga 3:29, 5:1, 13

Tamtamon to Krisi timin besoonja pa tutuunj mako

¹ Tauvene iit tamin besoonja pa tutuunj muul mako. Pasaa, Krisi ipas ghiit pa eez to taghoniinj tutuunj wa. Tauvene ayooz ariaanj. Apul tamtamon tigham gham amin besoonja muul sov. *

² Aloonj. Yau Paulus nasaav ghazoonja payam tauvene: Isaav ighe aloonj zeran tawe alinjazi, ve tirav waromim leso aduduunj ila Maaron maata, ene pale uraat to Krisi irau iuul gham mako. Mako kat.

³ Yau nasaav ghazoonja payam muul. Yam asov tau aghe ataghon eez to tutuunj ve ayok pa tirav waromim na, yam aat ataghon tutuunj ta naol ne le isov, o aduduunj ila Maaron maata. *

⁴ Tauvene yam tau anumeer ngar to taghoniinj tutuunj to igham gham aduduunj ila Maaron maata na, ayamaan gham. Pa ene yam arav motin tau-mim pa Krisi ve apul poia to Maaron wa. *

⁵ Eemon iit tau taghur ila to Krisi ne, Maaron Avuvu ipapalot ghiit ve tasasañan saawe to Maaron itotoi ghiit ighe iit taduduunj ila i maata. Gabua tawe, tauta taghurghur mataan pani kat. *

⁶ Iit tau taleep ila to Yesu Krisi na, tagham ngar tiina pa ravuunj tamtamon warozi muul mako. Pa ighe tirav waroon, ma tiravu mako, ene gabua to uliin mon. Ve isaav ighe ghuruunj ila toit ipaburigin ghiit gha loloon pa tamtamon ve tagham poghani zi, ene gabua tauu. *

* **5:1:** Yo 8:36; Ro 7:6, 8:2+; Ga 5:13 * **5:3:** Ro 2:25; Ga 3:10

* **5:4:** Ga 2:21 * **5:5:** Ro 8:23+; 2Tim 4:8 * **5:6:** 1Kor 7:19; Ga 6:15; Kol 3:11

7-8 Muuñ, yam alaan duduun itaghon eez to saveeñ onoon. Aazne, sei iponpoon gham pa landoon tsiam? Saveeñ ngoreeñ toozi tau ikau ngar tsiam na, ene ilam pa Maaron tau ipoi gham amin le ne mako. *

⁹ Tauvene ayamaan gham. “Pa yis ngiira mon, ene irau ipasaria palawa tiina.” *

¹⁰ Eemon yau naghur ila to Maaron naghe i tauu pale ipaduduun gham leso ataghon ngar tooni imin yau. Yau nakankaan pa sei tau ikau ngar tsiam. Eemon ñeer tawe pale igham atuya to sosor tooni tana. *

¹¹ Yam tonvetaz, yau nawatagh. Zeran siriv tingalñgal saveeñ karom payau tigde yau taug navovotia saveeñ pa tamtamon naghe yes aat titaghon tutuun to Mose, ve tirav warozi, o poia. Laak, ighe saveeñ toozi tawe onoon, puughu mindai ta yes Yuda tighurghur patañani payau soone? Imin ta naghhamgham tauvene, kanan saveeñ tau navovotia pa mateegh to Yesu izala ai pambaroon na, irau ireu tamtamon lolozi muul mako. *

¹² Yes tau tikau ngar tsiam ve tiyaryaan pa ravuun waromim na, yau naghe tipaal tauzi lambezi paam, o poia!

Ngar to loloon muñgaana ve ngar tau Avuvu Patabuyaan lolo pani na tipaparav

¹³ Yam tonvetaz, Maaron ipoi gham amin i le, leso amin besoon pa tutuun muul sov. Eemon ngar tana imin puughu payam to ataghon ngar

* **5:7-8:** 1Kor 9:24; Ga 1:6, 3:1 * **5:9:** 1Kor 5:6 * **5:10:** Ga 1:7

* **5:11:** 1Kor 1:23; Ga 6:12

to lolomim munğaana sov. Yam aat lolomim pa taumim, ve avaule gham. *

14 Pa tutuunj tisov tigheen ila tutuunj eemon loolo, ene vene: “Lolom pa tamtamon ve ugham poghani zi, imin yo lolom pa taum.” *

15 Eemon isaav ighe yam avazorai gham ve avomim ivaghani gham imin ngavuun sagsag tau tiparav ve tivaghani zi, na ayamaan gham. Pa ighe anoknoki tauvene, ene pale avaghamun taumim le asaghat kat.

16 Tauvene yau nasaav payam: Laghoonj tsiam, yam aat ataghon ngar to Maaron Avuvu. Ighe agham tauvene, ene irau ataghon lolomim munğaana muul mako. *

17 Aghita. Saawe isov, ngar to loloon munğaana ve Maaron Avuvu tivaghuru koi pa tauzi ve tiparav. Pasaa, ngar tau Maaron Avuvu loolo pani na, ene loloon munğaana izorzoora. Ve ngar tau loloon munğaana iyaryaanj pani ne, ene paam Maaron Avuvu izorzoora. Tauta saa ngar tau aghe aghamu, ene irau aghamu mako. *

18 Eemon isaav ighe ataghon pooz to Maaron Avuvu, ene aat aleep ila tutuunj saamba muul mako. *

Ngar to loloon munğaana

19 Ngar tau loloon munğaana ipapazaagh ghiit pani ne, ene iit tawataghi wa. Ene ngar tauvene: Taghur boog, tagham ngar tau ngalaanja mako,

* **5:13:** 1Kor 8:9; 1Pe 2:16 * **5:14:** Mt 22:37+; Ro 13:8+; Yems 2:8

* **5:16:** Ro 8:4, 13:14; 1Pe 2:11 * **5:17:** Ro 7:15, 8:6+ * **5:18:** Ro 6:14, 8:2, 14

loloon ipazaagh ghiit pa ngar sasaghati ve tala pa naghon mon, *

²⁰ tabees pa maaron karomņa, ngar to ghamuņ mur, taghur koi pa tamtamon, tavazorai ghiit, taghita zetaanņa tau lezi gabua katini na ve ireu loloon, ateen tuuku, takokook, mataan ingalņgal tauun mon, tavarewai ghiit ve taleep soghan soghan, tagham ngar taghe lupuņ toit mon ta iduduņ kat ila Maaron maata,

²¹ taghur koi pa zetaanņa tau lezi gabua katini, taghun le tavaghamgham, itiņa zetaanņa talup ghiit ve tagham ngar sasaghati naol toman oroor tiina, ve ngar sasaghati siriv paam. Saveeņ tau muņ nasavia payam, tauta aazne nayoli muul: Zeran tau titaghon ngar tauvene, yes irau tigham lepoogh poia izi Maaron nugh tooni mako. Pasaa, yes titaghon pooz tooni mako. *

Ngar tau Maaron Avuvu ipapaburigin ghiit pani

²² Ve Maaron Avuvu ipapaburigin ghiit pa ghamuņ ngar tauvene: Loloon pa tamtamon ve tagham poghani zi, loloon poia kat irau saawe, tatotoi ngar luuma pa tamtamon ve itiņa tavalupu ghiit tamin eemon, tatatan ateen, tagham poghania tamtamon ve tatotoi ngar popoia mon pazi, mataan ingal saveeņ mbuaan toit ve tataghoni, *

²³ ngar marowa, ve taņgin tauun poi. Aghita. Ngar tauvene, ene iduduņ mon. Tutuņ eta ingalsekin ghiit pani mako. *

* **5:19:** Ro 13:13+; Ep 5:3+ * **5:21:** 1Kor 6:9; Syg 22:15 * **5:22:** Ep 5:9; Kol 3:12 * **5:23:** Ro 3:31; 1Tim 1:9

²⁴ Yes tau timin Yesu Krisi le na, tigham lolozi munğaana tomania nğar sasaghati naol tau lolozi munğaana tawe ipapaghaar zi pani na, ve tiravu izala ai pambaroon gha imaat wa. *

²⁵ Iit tagham lepoogh paaghu ila to Maaron Avuvu wa. Tauvene laghoon toit, iit aat tataghon pooz to Maaron Avuvu. *

²⁶ Tauvene tapait tauun sov. Ve tawat zetaanja, ma taghur koi pa yes tau lezi gabua katini na sov. *

6

Tatotoi nğar poia pa tamtamon itaghon nğar to Krisi

¹ Yam tonvetaz, isaav ighe tsiam eta itap ve igham sosor, na yam tau ataghon nğar to Maaron Avuvu na, ala apaduduunja toman saveen marowa, leso itoor nğar tooni imuul ila pa Krisi. Eemon ayamaan gham. Pa aat tovaan ivot payam paam. *

² Avaule gham pa badoon patanani tsiam. Leso atotoi tutuun to Krisi anoonja ivot. *

³ Isaav ighe neer eta ighe i iliiv zeetja, ene itombaana tauu. Pasaa, tamtamon tauvene, i igham nğar irao soone. *

⁴ Tauvene tamtamon enaenja irau tigabiiz poghania uraat to tauzi: Uraat toozi poia ila Maaron maata, ma mako? Ighe uraat toozi poia, ene

* **5:24:** Ro 6:6; Ga 2:20; Kol 3:5 * **5:25:** Ro 8:4, 12+ * **5:26:** Ro 12:10+; Pil 2:3 * **6:1:** Mt 18:15; 2Tim 2:25; Yems 5:19 * **6:2:** Yo 13:34; Ro 15:1; 1Tes 5:14 * **6:3:** Ro 12:3; 1Kor 3:18, 8:2

yes irau tipakur zi pani. Ve tigabiiz uraat toozi tomania uraat to zetazña sov.

⁵ Pasaa, iit enjaenja aat tabaad patanani toit toit. *

Saa ngar tau ighe taghamu, ene pale murei tagham anoonja tooni

⁶ Isaav ighe tamtamon eta ipaghazonjai gham pa Maaron aliinja, yam aat arei gabua tsiam popoia siriv pani paam. *

⁷ Ayamaan taumim. Irau atombaan Maaron mako. Saa aniiñ tau ighe tavazoghi, ene aniiñ tana mon ta pale iza ve tataii. *

⁸ Tamtamon tau ighe ivazogh gabua tau ipazaagh loolo munjaana, ene aat ighita anoonja tauvene: I pale isaghat ve ilale. Ve tamtamon tau ighe ivazogh gabua tau ipariaañ ngar to Maaron Avuvu ila loolo, ene aat ighita anoonja poia tauvene: I pale igham lepoogh poia ila to Maaron Avuvu taghon taghon gha ila. *

⁹ Tiniin imum pa ghamuun ngar popoia sov. Pa ighe tapuli mako, ve tanoknok ghamuunni, ene aat taghita anoonja ila saawe tooni. *

¹⁰ Tauvene isaav ighe iit irau tauul tamtamon eta, na tauule. Tagham poghania tamtamon tisov. Ve yes tau tighur ila to Krisi na, iit aat tagham poghani zi kat. Pasaa, yes timin tonvetaz toit. *

Mategh to Krisi izala ai pambaroon, ene gabua tauu

* **6:5:** Ro 14:12 * **6:6:** 1Kor 9:7, 11, 14 * **6:7:** Ro 2:6; 1Kor 6:9;
2Kor 9:6 * **6:8:** Ro 8:13 * **6:9:** 1Kor 15:58; 2Tes 3:13; Hib 10:36
* **6:10:** Ep 2:19; 1Tes 5:15; 1Tim 6:18; 2Pe 1:7

¹¹ Aghita bodeen̄ tintiina tau taug nimag nabood zi ne.

¹² Yes tau timburmbuur gham pa taghoniin̄ tu-tuun̄ ve ravuun̄ waromim na, ene tigham pa ezazi mon. Ve tiroi paam: Isaav ighe tivotia saveen̄ pa mateegh to Krisi izala ai pambaroon̄, ene pale yes tau tighur ila mako na tighur patan̄ani pazi. *

¹³ Yes tau tiyooz ariaan̄ pa n̄gar to ravuun̄ tamtamon warozi na, tauzi titaghon̄ dudun̄ai tutuun̄ to Mose mako. Yes tizoornugh tighe tirav waromim pasaa, tighe tigham gham ataghon̄ n̄gar toozi. Leso tipait tauzi ezazi.

¹⁴ Eemon yau irau napait taug ezag, ma tamtamon ite paam eeza ne mako. Yesu Krisi tau imaat izala ai pambaroon̄, i mon ta igham ghau tintinig ve napait eeza. Yau naghita naghe saawe tau tirav Krisi imaat izala ai pambaroon̄, tirav ghau namaat tomania. Tauta mateegh tooni tapiri irav matin n̄gar to taan tau muun̄ igheen ila lolog na gha imaat wa. *

¹⁵ Tauvene isaav ighe tirav waroon, ma mako, ene gabua sorok. Uraat to Maaron tau igham ghiit tamin paaghu, tane mon ta gabua tauu. *

¹⁶ Tamtamon tisov tau titaghon̄ eez tauvene, Maaron tauu pale loolo isaghatin zi, ve ighur lu-uma tooni iza toozi. Pasaa, yes ta timin Israela duduun̄.

¹⁷ Aiyo, yau naghe napasov saveen̄ tsiau. Aazne ve ila, lolog pa tamtamon eta ighur patan̄ani payau

* **6:12:** Ga 5:11; Pil 3:18 * **6:14:** Ro 6:6; 1Kor 1:31, 2:2; Pil 3:7+

* **6:15:** Yo 3:3; Ro 2:28; 2Kor 5:17; Ga 5:6

muul mako. Pa sip tau ighenaar ila tinig ne, ene naghham zi pa Yesu Kresi eeza. *

¹⁸ Yam tonvetaz, poia to Tiina toit Yesu Kresi igheen tomani gham. Onoon.

* **6:17:** 2Kor 4:10, 11:23

**Maaron Saveen Tooni Patabuyaang
The New Testament and portions of the Old Testament
in the Tuam dialect of the Saveeng language of Papua
New Guinea. The Saveeng language is also called the
Mutu language.
Sampela hap Buk Baibel long tokples Saveeng Tuam
long Niugini.**

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

PDF generated using Haiola and XeLaTeX on 18 Apr 2025 from source files dated 31 Aug 2023

adb844f0-d769-5b05-9dd0-7c01fca938bb